



UNIVERSITÄTS-
BIBLIOTHEK
PADERBORN

Universitätsbibliothek Paderborn

Explicatio Symboli Illvstrissimo Viro D. D. Clavdio Peleterio Prætori Urbano, Et Ædilibus Oblati Pro expeditione Batavica

Santeul, Jean de

[S.l.], 1673

Ad Praetorem Urbanvm Et Aediles, Quod nova aedificiorum publicorum
magnificentia, & aquarum inductionibus Urbem exornaverint. Anno M. DC.
LXXIII. Ode.

urn:nbn:de:hbz:466:1-13490

Sic fertur olim marmoream sibi
Struxisse Romam Cæsar, & inclitas
Narratur Amphion magistris
Cantibus ædificasse Thebas.

At quis quadrigas liberioribus
Dat cive tuto currere compitis:
Quis sumptuosis jam capacem
Ædibus amplificavit Urbem?

Amni imminentem quis posuit rotam,
Qua flumen imum jam dociles super
Attollat vndas, & citato
Per varios fugiat canales

Declive lapsu? quin etiam impetum
Amat morando rumpere, nobiles
Errare per vicos, & Urbem
Vberibus recreare rivis.

Ille & minacem compede Sequanam
Frænavit audax, ne dominas vagus
Irrumpat arces, neu propinquos
Vorticibus populetur agros.

O mille quernis tempora cingite
Cives coronis : illius, illius,
Monstranda per feros nepotes
Quam populi stupeant, imago.

Palmis onustus, MAXIME PRINCIPVM,
Vrbem revisas, en tibi providus
PRÆTOR triumphanti superbos
Pro reditu meditatur arcus.

Descripta portis nobilioribus
Tot gesta, bello capta tot oppida,
Victas tot vrbes, tot subactos
Marte novo populos videbis.

Ferro rigentes aspicias tuos
Defensa vallis rumpere flumina,
Equisque sublimes anhelis
Fluminibus dare jura victis.

Ibit retortis fluctibus impotens
Rhenus, tonantem ad littora Cæsarem,
Rursus pavebit, turbulento
Triste fluens & iners in alveo.

Te fulminanti terribilem manu
Placabit vndis Mosa trementibus,
Supplexque TRAJECTI obstinatas
Mox Domino tibi pandet arces.

Te fama scuto scribet in aureo,
Et signa, victrix quæ manus abstulit,
Suspensa monstrabunt sub altis
Relligio, Pietasque templis.

At quos triumphis tollere se tuis
Spectabis arcus, non labor artifex,
Non PRÆTOR, ÆDILESVE ponunt:
Hos posuit tibi sola virtus.

